

GARIS PANDUAN PENGGUNAAN TULANG, TANDUK, GIGI DAN KUKU UNTUK DIJADIKAN BARANGAN GUNAAN DAN PERHIASAN

Muzakar ah Jaw atanku asa Fatw a MKI Kali Ke-80
1-3 Februari 2008

TUJUAN

Garis Panduan Penggunaan Tulang, Tanduk, Gigi Dan Kuku Untuk Dijadikan Barangan Gunaan Dan Perhiasan ini disediakan untuk dijadikan panduan kepada pengusaha dalam industri produk berasaskan tulang, tanduk, gigi dan kuku untuk menghasilkan produk selaras dengan kehendak Islam. Garis Panduan ini juga akan dijadikan sebagai panduan bagi Jabatan Kemajuan Islam Malaysia (JAKIM) dalam membuat pengesahan halal ke atas produk berasaskan tulang, tanduk, gigi dan kuku haiwan.

DEFINASI

Bagi tujuan garis panduan ini, definisi-definisi berikut adalah digunapakai:

1. Halal

Perkara yang dibenarkan oleh hukum syarak dan tidak akan dikenakan azab bagi orang yang melakukannya.

2. Hukum Syarak

- i. Dari segi istilah hukum syarak ialah perintah Allah yang berkait dengan perbuatan orang mukallaf secara tuntutan atau pilihan atau ketetapan (*al wadh'u*).
- ii. Berdasarkan kepada perundangan Malaysia, hukum syarak bermakna undang-undang Islam dalam mazhab Shafei atau undang-undang Islam dalam mana-mana satu mazhab sama ada Maliki, Hambali dan Hanafi yang telah dipersetujui oleh Yang di-Pertuan Agong dikuatkuasakan di Wilayah-wilayah Persekutuan, Pulau Pinang, Melaka, Sabah dan Sarawak atau oleh Raja atau

Sultan bagi mana-mana negeri dikuatkuasakan dalam negeri itu atau fatwa yang disahkan oleh pihak yang berkuasa mengenai Agama Islam.

3. **Barangan daripada tulang, tanduk, gigi dan kuku haiwan**

Semua barangan atau produk yang dihasilkan dari tulang, tanduk, gigi dan kuku haiwan sama ada barangan atau perhiasan. Tidak termasuk dalam kategori ini produk makanan.

4. **Najis**

i. Haiwan atau benda yang dikategorikan sebagai **najis** atau **terkena najis** (*mutanajjis*) ialah:

- a) haiwan atau benda yang dilarang oleh Islam memakannya seperti anjing dan babi dan terbitan dari keduanya, darah, bangkai dan arak.
- b) sebarang cecair atau objek yang keluar dari rongga manusia seperti air kencing, uri, tahi, darah, muntah, nanah. Susu, sperma dan ovum manusia adalah tidak najis.
- c) sebarang cecair atau objek yang keluar dari rongga haiwan seperti air kencing, uri, tahi, darah, muntah, nanah. Susu, sperma dan ovum haiwan adalah tidak najis, tetapi sperma dan ovum babi dan anjing adalah najis.
- d) bangkai haiwan atau haiwan halal yang tidak disembelih mengikut hukum syarak.
- e) bahan halal yang dicemari oleh bahan yang tidak halal.
- f) bahan halal yang bersentuhan dengan bahan-bahan yang tidak halal.

ii. Terdapat **tiga (3) jenis najis** iaitu:

- a) *Mughallazah* adalah ialah najis berat iaitu anjing dan babi (khinzir) termasuk sebarang cecair atau objek yang keluar daripada rongga anjing atau babi, keturunannya dan terbitan daripadanya.
- b) *Mutawassitah* adalah ialah najis pertengahan yang tidak

termasuk dalam kategori najis berat atau ringan seperti muntah, nanah, darah, arak, bangkai, cecair dan objek yang keluar daripada ronggga dan sebagainya.

- c) *Mukhaffafah* adalah ialah najis ringan. Najis yang berada di dalam kategori ini ialah air kencing bayi lelaki yang berusia tidak melebihi 2 tahun yang tidak mengambil apa-apa makanan dan minuman lain kecuali susu ibunya sahaja.

5. Tanduk

Termasuk juga gading gajah dan sumbu badak.

KATEGORI HAIWAN

Haiwan dikategorikan kepada tiga (3) iaitu :

1. Haiwan darat

Semua haiwan darat adalah halal dimakan kecuali :

- i. babi (khinzir) dan anjing serta keturunannya;
- ii. haiwan yang mempunyai taring atau gading yang digunakan untuk membunuh mangsa seperti harimau, beruang dan singa.
- iii. burung berkuku pencakar dan berparuh tajam atau burung pemangsa seperti helang dan gagak.
- iv. haiwan perosak seperti tikus, lipan, dan kalajengking.
- v. haiwan yang tidak dibenarkan untuk dibunuh di dalam Islam seperti semut, lebah, belatuk dan nuri.
- vi. haiwan yang dianggap menjijikkan seperti kutu, dan lalat.
- vii. keldai peliharaan.
- viii. binatang *jallah* iaitu binatang yang halal yang diberi makan dengan benda yang kotor (*jullah*).

2. Haiwan Akuatik

Haiwan akuatik ialah haiwan yang **hidup di dalam air dan tidak**

boleh hidup di darat, seperti ikan, udang, ketam dan sotong. Semua haiwan akuatik adalah halal kecuali yang beracun, memabukkan atau memudaratkan kesihatan.

3. Haiwan Dua Alam

Haiwan dua alam yang hidup di darat dan di dalam air seperti penyu, buaya dan katak adalah tidak halal.

PEMBAHAGIAN TULANG, TANDUK, PARUH, GIGI DAN KUKU HAIWAN

1. Tulang, tanduk, paruh, gigi dan kuku dari haiwan yang halal dimakan.

- i. **Tulang, tanduk, paruh, gigi dan kuku** haiwan yang halal dimakan seperti unta, lembu, kerbau dan rusa yang diambil **semasa hidup** adalah **bangkai**.
- ii. **Tulang, tanduk, paruh, gigi dan kuku** haiwan yang halal dimakan seperti rusa, lembu, kerbau yang **mati bukan melalui sembelihan mengikut hukum syarak** adalah **bangkai**.
- iii. **Tulang, tanduk, paruh, gigi dan kuku** haiwan yang halal dimakan dan diambil setelah mati kerana sembelih mengikut hukum syarak adalah suci dan boleh dimanfaatkan.

2. Tulang, tanduk, paruh, gigi dan kuku dari haiwan yang haram dimakan.

Tulang, tanduk, paruh, gigi dan kuku haiwan yang haram dimakan adalah **bangkai**, samada ia diambil semasa ia hidup atau setelah mati samada ia disembelih mengikut hukum syarak atau tidak disembelih.

3. Tulang, tanduk, gigi dan kuku dari haiwan dalam kategori najis *mughallazah*.

Tulang, tanduk, gigi dan kuku dari haiwan dalam kategori najis *mughallazah* iaitu babi, anjing dan keturunan dari keduanya adalah najis dan tidak boleh dimanfaatkan.

JENIS BARANGAN YANG DIPERBUAT DARI TULANG, TANDUK, GIGI DAN KUKU HAIWAN YANG TIDAK DIBENARKAN

1. Perhiasan dan barang gunaan yang dibuat hendaklah bukan dalam bentuk yang boleh ditakrifkan sebagai bercanggah dengan akidah Islam. Contoh patung, salib dan sebagainya.
2. Perhiasan dan barang gunaan yang dibuat hendaklah bukan dalam bentuk makhluk bernyawa iaitu manusia dan haiwan.

KESELAMATAN

Produk yang dihasilkan hendaklah selamat diguna dan tidak memudaratkan tubuh badan manusia.

PERALATAN, PERKAKAS, MESIN DAN BAHAN BANTUAN PEMROSESAN

Semua peralatan, perkakas, mesin dan bahan bantuan pemprosesan hendaklah tidak diperbuat dari bahan najis dan tidak digunakan untuk memproses bahan najis.

PEMBUNGKUSAN

Pembungkus yang digunakan hendaklah tidak diperbuat dari najis atau bersentuhan dengan najis.

PENYIMPANAN

Penyimpanan produk siap hendaklah diasingkan dari najis atau produk yang dihasilkan dari najis.

PELABELAN DAN PENGIKLANAN

Pelabelan dan pengiklanan hendaklah tidak melanggar prinsip-prinsip hukum syarak serta tidak menonjolkan unsur-unsur tidak sopan yang bertentangan dengan hukum syarak.

KEPERLUAN PERUNDANGAN

Produk tersebut di dalam aspek-aspek lain, hendaklah mematuhi undang-undang termasuk sebarang peraturan yang berkenaan yang berkuatkuasa di Malaysia seperti Akta Perlindungan Hidupan Liar 1972.